

# Maria i Su Yu Divino

Imaginá ku mi ta stima vruminga pikadó. Mi no ta gusta ku nan ta pikámi, ma tòg mi ta apresiá nan. Suponé ku mi ke komuniká ku e vruminganan ku mi ta stima nan. Kon lo mi por hasi esei? Mi ta kai riba e idea di pone garná di pan i otro kuminda pa nan. Tur dia mi ta hasi esaki, sin falta. Ma despues di un aña di e regalonan diario, tòg nan ta piká mi. Nan no ta komprendé ku mi ta stima nan. Kon mi por komuniká mi stimashon pa nan?

Mi ta haña un otro idea. Si mi BIRA vruminga, e ora ei mi por laga nan sa di mi amor pa nan. Lo mi por komuniká na nan "idioma" pa nan komprendé.

Dos mil aña pasá algu similar a sosodé. Dios a stima humanidat pekaminoso. El a komuniká Su amor na e rasa humano. El a basha bendishon na abundansia riba hende. Ma nan no a komprendé! Pesei, DIOS A BIRA HENDE. Dios Yu, ku sèmper a eksistí, a bira un ser humano pa E por salba hende pekadó.

Ma kon esei por sosodé? Segun Beibel "no tin un hende hustu, ni sikiera un so...TUR a kometé piká" (Romanonan 3:23). Pues E lo mester nase di un pekadó. Si tantu Su tata komo Su mama ta humano, E mes lo ta un pekadó. P'esei, E mester tin un Tata divino (pa E ta 100% Dios i sin piká) i un mama birgen humano (pa E ta 100% hende). Dios a selektá Maria pa ta e birgen ei!

Pensa un ratu tokante e mama di Hesus. Nos no sa nòmber di e mayornan di Maria. Algun studiante di Beibel ta kere ku e generashonnan di Maria ta listá den Lukas 3:23-38, i ta inkluí nòmber di su tata, Heli. Ma ta sigur, ku tantu Hose komo Maria tabata desendiente di e gran rei di Israel, David. Hesus tabata konosí komo "yu di David" (Mateo 9:27; 15:22; 20:30-31).

Segun kustumber hudío, un pareha a komprometé pa un aña i a kasa ora e dams tabata hopi yòn. Probabelmente Hose i Maria a komprometé ora Maria tabatin entre 12 pa 17 aña di edat. Méskos ku tur hóben, nan lo a antispá e plasernan i luchanan di matrimonio huntu ku nan yunan. Ma durante e aña di kompromiso Dios a interumpí nan plan i nan a kasa promé ku nan a plania.

Despues di e nasementu di Hesus, Hose i Maria a sigui biba komo un pareha kasá. Skritura Santu ta laga sa ku Dios a bendishoná nan kas ku por lo ménos seis yu mas: Santiago, Hose, Hudás, Simon, i sikiera dos yu muhé (Marko 6:3).

Debí ku Beibel no ta menshoná Hose despues ku Hesus a kumpli 12 aña di edat, ta pensá ku el a muri promé ku Hesus a kuminsá Su ministerio ku 30 aña. Ma Maria ta menshoná den diferente relato den Skritura, asta na Hesus Su krusifikashon (Juan 19:25-27) i despues di Su asenshon (Echunan 1:14). Komo ku Palabra di Dios no ta bisa nada tokante Maria su morto, nos no sa nada di esaki

Lo tabatin hopi kos ku Maria no a komprendé di e Beibi ku el a tene den su brasanan. Ma e tabata sa ku Hesus a bin pa salba pekadónan. E angel a instruí "Yama Su nòmber Hesus; pasobra E lo salba Su puebel di nan pikánan" (Mateo 1:21). Tambe un angel a anunsiá na e wardadónan di karné "Awe a nase e Salbador ku ta Kristo e Señor..." (Lukas 2:11). Nos, méskos ku Maria, mester rekonosé ku nos ta pekadó i invitá Hesus pa salba nos di tantu piká komo di e kastigu pa piká.

Maria tambe a rekonosé Hesus Su outoridat superior. Ora biña a kaba na un kasamentu, Maria a pidi Hesus pa yuda, avisando e sirbidornan "Hasi loke E bisa boso" (Juan 2:5). Esei ta bon instruksjon! Si nos hasi loke Hesus ta bisa, den Beibel, nos por ta sigur ku nos ta kana den un bon kamina! Hesus a bisa "Ami ta e porta, esun ku drepta pa medio di Mi ta salbá..." (Juan 10:9). "Ami ta e kamina, bèrdat, i bida; ningun ta bini serka e Tata sino pa medio di Mi" (Juan 14:6). I e apòstel Pablo ta agregá: "Un Dios so tin, i un Mediadó so meimei Dios i hende, kua ta Hesu-Kristo, hende" (1 Timoteo 2:5).

Maria di bèrdat ta un muhé bendishoná. Ma nos por ta mas bendishoná! Ora un muhé a bisa Hesus, "Bienaventurá ta e skochi ku a karga bo i e pechu ku a kriá bo," Hesus a reakshoná mas bien, "Bienaventurá ta esnan ku ta tende palabra di Dios i ward'é" (Lukas 11:27-28). Maria su laso ku Hesus ta un bendishon. Ma un bendishon mas grandi ta warda esun ku ta obedesé Palabra di Dios!

Maria a mostra nos den direkshon di Hesus, pasobra den Kristo Hesus—Dios mes!--SO tin salbashon! Ningun ta yega serka Dios via di otro hende òf ruta!